



Savevas vus che...

Tschintg facts davart l'inegualitad da pajas

■ **(fmr/sb) Las raschuns per differenzas da pajas tranter um e dunna èn multifaras. Per part datti motivs istorics. Dentant er stereotips da schlattaina ch'èn profundamain enragischads en la societad.** Er motivs pratics èn ina raschun per la negualitad: I mancan plazzas per dar en canorta uffants. E lavurs betg pajadas sco tgirar u schubregiar vegnan savens surprindidas da dunnas. La FMR preschenta tschintg facts.

Fact 1: Dunnas gudognan simplamain pli pauc

La paja brutto standardisada (median dal 2018) en il sectur privat da las dunnas è 5651 francs. E la paja dad umens: 6600 francs. Quai corresponda ad ina differenza da 14,4%. Er en il sectur public datti ina differenza da paja: ils umens gudognan 11,4% dapli che las dunnas. Radund 40% da las differenzas da paja na pon betg vegnir decleradas cun criteris objectivs sco p.ex. onns da lavur, scolaziun, bransch.

Fact 2: Pajas bassas pertutgan cunzunt dunnas

Ina paja bassa è, sch'ina persuna gudogna mo dus terz dad ina paja brutto mediana. E savens pertutga quai dunnas. Vul dir: la cumpart da persunas cun ina paja bassa è fermamain dependenta da la schlattaina. P.ex. en il sectur privat e public han 8,1% dals umens ina paja bassa. E radund 16,7 % da las dunnas.

Fact 3: Pajas pli bassas malgrà medema competenza

Tuttina tge nivel da competenza – dunnas vegnan sistematicamain pajadas mender

che umens. Er tar ina medema scolaziun e in medem nivel da ierarchia, è la paja brutto standardisada dad ina dunna pli bassa che tar in um. Tut tenor scolaziun gudognan dunnas tranter 6% (patenta da scolastas) e 19% (scola auta universitara) pli pauc che umens. La paja da dunnas è tut tenor ierarchia tranter 8% (cader inferior) e 19% (cader superior) pli bassa ch'ina paja dad in um.

Fact 4: La naschientscha dad in uffant avra la forsch

Savens lavuran dunnas suenter la naschientscha be pli cun in pensum parzial. Differents studis mussan che dunnas survegnan pli pauca paja, cura ch'ellas vegnan mamma. Bliers umens che vegnan bab però survegnan dapli paja.

Fact 5: Las differenzas da paja sa sminueschan plaunsieu

Tendenzialmain sa sminueschan però las differenzas da paja tranter um e dunna. La cumpart dals motivs che n'èn betg declerabels stagneschan dapi onns tar circa 40% da l'entira differenza da paja.

Questas cifras sa basan sin studis da l'Uffizi federal da statistica e dal Biro federal per egualitad - studis publicgads sin www.bfs.admin.ch e www.ebg.admin.ch

La redacziun da la FMR preschenta quest'omna – en connex cun ils 50 onns dretg da vuschar per las dunnas en Svizra - intgins fatgs interessants u particulars en dumondas d'egualitad.